


燕日湖漁唱
補續遺
喜詞





日 湖 漁 唱

遺補續 遺補

陳 允 平 撰

編主五雲王

編初成集書叢

種一他其及唱漁湖日

中華民國二十五年六月初版

周

發行人

王雲五
上海河南路

印刷所

商務印書館
上海河南路

發行所

商務印書館
上海及各埠

(本書校對者黃逸之)

一三八四上

右日湖漁唱一卷。宋陳允平撰。案允平字君衡。號西麓。句章人。張炎樂府指迷稱詞欲雅而正。志之所之。一爲物所役。則失其雅正之音。近代陳西麓所作。平正亦有佳者。我朝朱竹垞撰詞綜。嘗謂論詞必出於雅正。故曾慥錄雅詞。銅陽居士輯復雅。其論實本於炎。而炎以屬之西麓。固倚聲嫡派矣。考西麓詞。如摸魚兒云。春已暮。縱燕約鶯盟。無計留春住。江城子云。燕初還。杏花殘。簾裏春深。簾外雨聲寒。祝英臺近云。春自年年。花自爲春開。是他春爲花愁。花因春瘦。花殘後人未歸來。清平樂云。去年共倚秋千。今年獨倚闌干。誤了海棠時候。不成直待花殘等句。清轉華妙。宜玉田生秀冠江東。亦相推挹矣。厲樊榭等南宋雜事詩注。稱西湖十景。始自南宋。瞿宗吉稱周草窗賦木蘭花慢。張子成賦應天長。皆晚宋名作。今草窗十景。已軼不傳。獨張子成。陳君仲。所作具在。各存五首。以見勝槩。蓋亦甚重其詞也。又

知西麓字君衡。復字君仲。抑傳寫之訛也。此本爲江都秦太史恩復所刻。自署所居曰詞隱草堂。蓋亦究倚聲之學者。咸豐辛亥三月之望。時清明後十一日矣。南海伍崇曜謹跋。

日湖漁唱目錄

慢

摸魚兒

木蘭花慢

絳都春

醉江月

倦尋芳

大酺

永遇樂

月上海棠

疎影

暗香

水龍吟

齊天樂

醉江月

挂枝香

漢宮春

木蘭花慢

寶鼎現

八寶粧

畫錦堂

綺羅香

西湖十詠

探春

秋霽

百字令

掃花遊

八聲甘州

驀山溪

齊天樂

黃鶯兒

渡江雲

婆羅門引

引令

明月引

糖多令

江城子

思佳客 五首

惜分飛

長相思

祝英臺近

戀繡衾

南歌子

戀繡衾

謁金門

菩薩蠻

青玉案

戀繡衾

南歌子

醉桃源

清平樂

謁金門

浣溪沙

鷓鴣天

謁金門

朝中措

小重山

霜天曉角

糖多令

柳梢青 四首

思佳客

糖多令

壽詞

瑞龍吟

渡江雲

八聲甘州

三犯渡江雲

過秦樓

醉蓬萊

法曲獻仙音

八聲甘州

蘭陵王

木蘭花慢

摸魚兒

漢宮春 二首

風入松

西湖明月引

臨江仙

少年遊

鷓鴣天

霜天曉角

日湖漁唱

句章 陳允平 君衡

慢

摸魚兒

西湖
送春

倚東風。畫欄十二。芳陰簾幕低護。玉屏翠冷梨花瘦。寂寞小樓煙雨。
腸斷處。悵折柳柔情。舊別長亭路。年華似羽。任錦瑟聲寒。瓊簫夢遠。
羞對彩鸞舞。文園賦。重憶河橋眉嫵。啼痕猶濺紈素。丁香共結相
思恨。空託繡羅金縷。春已暮。縱燕約鶯盟。無計留春住。傷春倦旅。趁
暗綠稀紅。扁舟短棹。載酒送春去。

木蘭花慢

賦牡丹

杜鵑聲漸老。過花信。幾番風。愛翠幄籠晴。文梭颺暖。欄檻青紅。新粧
步搖未穩。捧心嬌。乍入館娃宮。消得金壺萬朵。護風簾幄重重。忽

忽。少小憶相逢。詩鬢已成翁。且持杯秉燭。天香院落。同賞芳穠。花應怕春去早。儘遲遲待取綠陰濃。拌却花前醉也。夢隨蝴蝶西東。

絳都春

舊上聲韻。今改平聲。

鞦韆倦倚。正海棠半坼。不耐春寒。滯雨弄晴。飛梭庭院。繡簾閑。梅粧欲試芳情懶。翠顰愁入眉彎。霧蟬香冷。霞綃淚搵。恨襲湘蘭。悄悄池臺步晚。任紅暎杏靨。碧沁苔痕。燕子未來。東風無語。又黃昏。琴心不度春雲遠。斷腸難託啼鴉。夜深猶倚。垂楊二十四欄。

醉江月

賦水仙水

漢江露冷。是誰將瑤瑟。彈向雲中。一曲清冷。聲漸杳。月高人在珠宮。暈額黃輕。塗腮粉豔。羅帶織青葱。天香吹散。珮環猶自丁東。回首杜若汀洲。金鈿玉鏡。何日得相逢。獨立飄飄。煙浪遠。襪塵羞濺春紅。渺渺予懷。迢迢良夜。三十六陂風。九疑何處。斷魂飛度千峰。

倦尋芳

杏簷轉午。清漏沈沈。春夢無據。鳳錦龜紗。空閉酒塵香霧。流水行雲
天四遠。玉簫聲斷人何處。倦尋芳。鎖情尖翠壓。彊拈飛絮。記舊約
醪醖開後。屈指心期。數了還數。誤我凭欄。幾度片帆南浦。燕懶鶯慵
春去也。落花猶是東風主。正銷凝。被愁鴟又啼煙樹。

大酺

元夕
寓京

漸入融和。金蓮放。人在東風樓閣。天香吹輦路。淨無雲一點。桂流霜
魄。雪霽梅飄。春柔柳嫩。半捲眞珠簾箔。迢迢鳴鞘過。隘車鈿。轡玉。暗
塵輕掠。擁瓊管吹龍。朱絃彈鳳。柳衢花陌。鼇山侵碧落。絳綃遠。春
靄浮鳩鵲。民共樂。金吾禁靜。翠蹕聲閑。遍青門盡停魚鑰。袂襪寒初
覺。方怪失繡鴛弓窄。誤良夜。瑤臺約。漸綵霞散。雙闕星微。煙薄。洞天
共誰跨鶴。

永遇樂

舊上聲韻今
移入平聲

玉腕籠寒。翠欄凭曉。鶯調新簧。暗水穿苔。遊絲度柳。人靜芳晝長。雲南歸鴈。樓西飛燕。去來慣認炎涼。王孫遠。青青草色。幾回望斷柔腸。薔薇舊約。樽前一笑。等閑孤負年光。鬪草庭空。拋梭架冷。簾外風絮香。傷春情緒。惜花時候。日斜尚未成粧。聞嬉笑。誰家女伴。又還採桑。

月上海棠

遊絲弄晚。捲簾看處。燕重來時候。正秋千亭榭。錦窠春透。夢回褪浴華清。凝溫泉絳綃微縷。芳陰底人立東風。露華如畫。宜酒。啼香淚薄。醉玉痕深。與春同瘦。想當年金谷。步帷初繡。綵雲影裏徘徊。嬌無語。夜寒歸後。鶯窗曉。花閒重攜素手。

疎影

疎影、暗香。白石自度曲也。予過宛陵。登雙溪疊嶂。拊先伯父菊坡先生遺墨有感。借韻以賦。

千峰翠玉。送孤雲伴我。羅窗清宿。拂曉凭虛。春碧生寒。衣單瘦倚筇竹。東風不解吹愁醒。但芳草、溪城南北。認霧鬢、遙鎖脩顰。眉嫵爲誰愁獨。江上輕鷗似識。背昭亭兩兩。飛破晴綠。一片蒼煙。隔斷家山。夢遶石窻蘿屋。相看不厭朝還暮。算幾度、赤闌干曲。待倩詩收拾歸來。寫作臥遊屏幅。

暗香

霽天秋色。正倚樓待月。誰伴橫笛。漲綠浮空。閑數河星。手堪摘。瀾望澄光練淨。分付與、元暉才筆。煙澱闊雲遠。波平歸鳥趁風席。南國。信音寂。悵鴈渚渡閑。鷺汀沙積。蘚碑露泣。時拊遺蹤。暗嗟憶。人事空隨逝水。今古但、雙流一碧。待辦取、蓑共笠。小舟泛得。

水龍吟

奉川寶
化鳳花

杜鵑啼老春愁。淚痕吹作胭脂雨。飛花亂點。東風枝上。紅翔翠翥。丹
穴鳴初。碧梧棲未。淒涼山塢。悵瓊姬夢遠。玉簫聲斷。孤鸞影。對誰舞。
林下風光自許。算何必。玉京瑤圃。闌干醉倚。遊塵香散。芳菲無主。
經院僧眠。月樓鐘靜。欲飛還駐。待青松化盡。蒼龍頭角。共乘雲去。

齊天樂

澤國樓
偶賦

湖光祇在闌干外。凭虛遠迷三楚。舊柳猶青。平蕪自碧。幾度朝昏煙
雨。天涯倦旅。愛小却遊鞭。共揮談塵。頓覺塵清。宦情高下等風絮。
芝山蒼翠縹緲。黯然仙夢杳。吟思飛去。故國樓臺。斜陽巷陌。回首白
雲何處。無心訪古。對雙塔棲鴉。半汀歸鷺。立盡荷香。月明人笑語。

醉江月

霽空虹雨。傍啼螿莎草。宿鷺汀洲。隔岸人家砧杵急。微寒先到簾鉤。

步幄塵高。征衫酒潤。誰暖玉香篝。風燈微暗。夜長頻換更籌。應是鴈柱調箏。鴛梭織錦。付與兩眉愁。不似樽前今夜月。幾度同上南樓。紅葉無情。黃花有恨。孤負十分秋。歸心如醉。夢魂飛趁東流。

挂枝香

楊山甫
席上賦

殘蟬乍歇。又亂葉打窗。蛩韻淒切。寂寞天香院宇。露涼時節。乘鸞扇底婆娑影。幻清虛廣寒宮闕。小山秋重。千巖夜悄。舉樽邀月。甚賦得仙標道骨。倩誰搗玄霜。猶未成屑。回首藍橋路迥。夢魂飛越。雕欄翠鬢金英滿。灑西風非雨非雪。惜花心性。輸他少年。等閑攀折。

漢宮春

芍藥

開盡酴醾。正柔雲麥浪。天氣如秋。南園露梢半拆。金粟絲頭。溫香傍酒。儘多嬌不識春愁。鶯院悄。輕陰弄晚。何人堪伴清遊。偏愛紫裝黃裊。想金壺勝賞。依舊揚州。花前夜闌醉後。斜月當樓。翻階句好。記

元暉此日風流。雙鬢改。一枝帽底。如今應爲花羞。

木蘭花慢

和李貧房題張寄閑家圖韻

愛吟休問瘦。爲詩句。幾凭闌。有可畫亭臺。宜春帳箔。寄寄身閑。胸中
四時勝景。小蓬萊。幻出五雲間。一掬蘋香暗沼。半梢松影虛壇。相
看。倦羽久知還。回首鷺盟寒。記步履尋雲。呼燈聽雨。越嶺吳巒。幽情
未應共嬾。把周郎舊曲譜新翻。簾外垂楊自舞。爲君時按弓彎。

寶鼎現

雲巖師書燈夕命賦

六鼇初駕。縹緲蓬閬。移來洲島。還是梅飄冰泮。一夜青陽回海表。
漸媚景。傍元宵時候。花底餘寒料峭。更喜報三邊晏靜。人樂清平宇
宙。畫鼓簇隊行春早。擁烟花粉黛。繚繞開洞府。桃源路窈。戟外東
風吹岸柳。正翠靄映星橋月榭。十里紅蓮綻了。慶萬家珠簾半捲。綽
約歌裙舞袖。重錦繡。幄圍香闥。鳳管鸞絲環奏。望非煙非霧。春在壺

天易曉。早隱隱半空星斗。看取收燈後。趁鳳書催入黃扉。立馬金門玉漏。

八寶粧

秋宵有感

望遠秋平。初過雨微茫。水滿煙汀。亂蕙疎柳。猶帶數點殘螢。待月重樓誰共倚。征鴻斷續兩三聲。夜如何。頓涼驟覺。紈扇無情。還思驂鸞素約。念鳳簫鴈瑟。取次塵生。舊日潘郎雙鬢。半已星星。琴心錦意暗懶。又爭奈西風吹恨醒。屏山冷。怕夢魂飛度。藍橋不成。

畫錦堂

北城韓園卽事

上苑寒收。西陸雨歇。東風是處花柳。步錦籠紗。依舊五陵臺沼。繡箔珠簾金翠裊。瑣窗雕檻青紅鬪。頻回首。茶竈酒壚。春時幾番攜手。知否。人漸老。嗟眼爲花狂。肩爲詩瘦。喚醒鄉心。無奈數聲啼鳥。秉燭清遊嫌夜短。采香新意輸年少。歸來好。政趁故園池閣。綠陰芳草。

綺羅香 秋雨

鴈宇蒼寒。蛩疏翠冷。又是淒涼時候。小揭珠簾。衣潤唾花羅縵。饒曉鷺獨立衰荷。遡歸燕尙栖殘柳。想黃華羞澀東籬。斷無新句到重九。孤檠清夢易覺。腸斷唐宮舊曲。聲迷官漏。滴入愁心。秋似玉樓人瘦。煙檻外催落梧桐。帶西風亂捎鴛鴦。記畫簷燈影沈沈。共裁春夜韭。

西湖十詠

探春

蘇堤
春曉

上苑烏啼。中洲鷺起。疎鐘纔度雲窈。篆冷香篝。燈微塵幌。殘夢猶吟芳草。搔首捲簾看。認何處六橋煙柳。翠橈纔艤西冷。趁取過湖人少。掠水風花繚繞。還暗憶年時。旗亭歌酒。隱約春聲。鈿車寶勒。次第鳳城開了。惟有踏青心。縱早起不嫌寒峭。畫闌閑立。東風舊紅誰掃。

秋霽

平湖
秋月

千頃玻璃。送遠目斜陽漸下林間。題葉人歸。採菱舟散。望中水天一色。碾空桂魄。玉繩低轉雲無迹。有素鷗閑伴。夜深呼棹過環碧。相思萬里。頓隔嬋媛。幾回瑤臺同駐鸞翼。對西風憑誰問取。人閒那得有今夕。應笑廣寒宮殿窄。露冷烟澹。還看數點殘星。兩行新鴈。倚樓橫笛。

百字令

斷橋
殘雪

凝雲匝曉。正蘼花纔積。荻絮初殘。華表翩躚何處鶴。愛吟人在孤山。凍解苔鋪。冰融沙聳。誰凭玉句闌。茸衫氈帽。冷香吹上吟鞭。將次柳際瓊消。梅邊粉瘦。添做十分寒。閑踏輕澌來薦菊。半潭新漲微瀾。水北峯巒。城陰樓觀。留向月中看。巘雲深處。好風飛下晴湍。

掃花遊

雷峯
落照

日湖漁唱

數峰蘸碧。記載酒甘園。柳塘花塢。最堪避暑。愛蓮香送晚。翠嬌紅嫵。
欸乃菱歌。乍起蘭橈競舉。日斜處。望孤鶩斷霞。初下芳杜。遙想山
寺古。看倒影金輪。溯光朱戶。暝煙帶樹。有投林鷺宿。凭樓僧語。可惜
流年。付與朝鐘暮鼓。謾凝竚。步長橋月明歸去。

八聲甘州

夔院
風荷

放船楊柳下。聽鳴蟬。薰風小。新堤正。煙蒨露蓼。飛塵釀玉。第五橋西。
遙認青羅蓋底。宮女夜遊池。誰在鴛鴦浦。獨棹玻璃。一片天機雲
錦。見凌波翠碧。照日臙脂。是西湖西子。晴抹雨粧時。便相將。無情秋
思。向菰蒲深處。落紅衣。醺醺裏。半篙香夢。月轉星移。

驀山溪

花港
觀魚

春波浮綠。小隱桃溪路。煙雨正林塘。翠不礙錦鱗來去。芹香藻膩。偏
愛鯉花肥。簷影下。柳陰中。逐浪吹萍絮。宮溝泉滑。怕有題紅句。鉤

餌已忘機。都付與人閒兒女。濠梁興在。鷗鷺笑人癡。三湘夢。五湖心。雲水蒼茫處。

齊天樂

南屏晚鐘

赤欄橋畔斜陽外。臨江暮山凝紫。戲鼓纔停。漁榔乍歇。一片芙蓉秋水。餘霞散綺。正銀鑰停關。畫船催艤。魚板敲殘。數聲初入萬松裏。坡翁詩夢未老。翠微樓上月。曾共誰倚。御苑煙花。宮斜露草。幾度西風彈指。黃昏盡也。有眠月閑僧。醉香遊子。鷺嶺猿啼。喚人吟思起。

黃鶯兒

柳浪聞鶯

六橋煙黛浮空遠。南陌嚶嚶。喬木初遷。紗窗無眠。畫欄凭曉。看並宿暗黃深。織霧金梭小。那人攜酒聽時。料把春來詩夢驚覺。飛遶翠接斷橋雲。綠漾新堤草。數聲嬌轉。婉婉如愁。調簧弄歌尖巧。隨燕啣軟塵低。蝶妥遊絲裊。最憐舞絮飛花。喚却東風老。

渡江雲

三潭印月

三神山路杳。六鼇駕浪。幻境口西湖。水連天四遠。翠臺如鼎。簇簇小浮屠。煙沈霧迴。怪蜃樓飛入清虛。秋夜長。一輪蟾素。漸漸出雲衢。遙看寒光金鏡。皓彩明璫。正人閒三五。總輪與鷗眠。葑蓼。鷺立菰蒲。笙歌喚醒魚龍睡。向貝闕爭取明珠。清夢斷。西風醉宿冰壺。

婆羅門引

兩峯插雲

髻鬟對聳。萬松扶玉上青冥。西風共倚。煙南水北。石荒苔老。三十六梯平。愛翠尖如削。天外亭亭。高寒夢驚。是何夕。墮雙星。無限蒼崖紫岫。誰拊稜層。薜蘿深處。算少年遊屐幾番登。河漢近。疑在蓬瀛。右十景。先輩寄之歌詠者多矣。雪川周公謹。以所作木蘭花示予。約同賦。因成。昔景定癸亥歲也。

引令

明月引

和白雲趙宗簿自度曲

雨餘芳草碧蕭蕭。暗春潮。蕩雙橈。紫鳳青鸞。舊夢帶文簫。綽約珮環風不定。雲欲墮。六銖香。天外飄。相思爲誰蘭恨銷。眇湘魂。無處招。素紈猶在。眞眞意。還倩誰描。舞鏡空圓。羞對月明宵。鏡裏心心心裏月。君去矣。舊東風。新畫橋。

糖多令

吳江道上寄鄭可大

何處是秋風。月明霜露中。算淒涼未到梧桐。曾向垂虹橋上看。有幾樹。水邊楓。客路怕相逢。酒濃愁更濃。數歸期猶是初冬。欲寄相思無好句。聊折贈。鴈來紅。

江城子

東風吹恨上眉彎。燕初還。杏花殘。簾裏春深。簾外雨聲寒。拾翠芳期孤負却。空脈脈。倚闌干。流蘇香重玉連環。繞屏山。寶箏閒。淚薄鮫

銷。零露溼紅蘭。瘦却舞腰。渾可事銀蹀躞。半闌珊。

思佳客

用晏小山韻

一曲清歌酒一鍾。舞裙搖曳石榴紅。寶箏絃轟冰蠶縷。珠箔香飄水麝風。嬌姪姘。笑迎逢。合歡羅帶兩心同。綵雲不覺歸來晚。月轉觚稜夜氣中。

又

壓鬢釵橫翠鳳頭。玉柔春膩粉香流。紅酣醉靨花含笑。碧翦顰眉柳弄愁。偏婀娜。太溫柔。水情雲意兩綢繆。佯羞不顧雙飛蝶。獨背秋千傍畫樓。

又

錦幄沈沈寶篆殘。惜春無語凭闌干。庭前芳草空惆悵。簾外飛花自往還。金屋靜。玉簫閑。一樽芳酒駐紅顏。東風落盡酴醾雪。滿院清

香夜不寒。

又

玉轡青驄去不歸。錦中頻織斷腸詩。窗凭繡日鶯聲婉。簾捲香雲鴈影回。金縷扇。碧羅衣。蝶魂飛度畫闌西。花開花落春多少。獨有層樓雙燕知。

又

曾約雙瓊品鳳簫。玉臺光映玉嬌嬈。銀花燭冷飛羅暗。寶屑香融曲篆銷。簾影亂。漏聲迢。珮雲清入楚天遙。題紅未託相思約。明月空歸第五橋。

惜分飛

釧閣桃腮香玉溜。困倚銀牀倦繡。雙燕歸來後。相思葉底尋紅豆。碧唾春衫還在否。重理弓彎舞袖。錦藉芙蓉綉。翠腰羞對垂楊瘦。

長相思

風蕭蕭。雨騷騷。風雨蕭蕭梧葉飄。瀟湘江畔樓。雲迢迢。水遙遙。雲水迢遙天盡頭。相思心上秋。

祝英臺近

待春來。春又到。花底自徘徊。春殘花遲。攜酒爲春催。可堪碧小紅微。黃輕紫豔。東風外。粧點池臺。且銜杯。無奈年少心情。看花能幾回。春自年年。花自爲春開。是他春爲花愁。花因春瘦。花殘後人未歸來。

戀繡衾

湘桃紅淺柳褪黃。燕初來。宮漏漸長。任日轉花梢也。倚蘭屏猶未試粧。秦鸞舊曲無心理。憶年時相傍採桑。聽綠樹嬌鶯。一聲聲都是斷腸。

南歌子
茉莉

素質盈盈瘦。嬌姿淡淡粧。曲句闌畔倚秋娘。一撮風流都在晚西涼。
綵線串層玉。金篝絡細香。半鉤新月浸牙牀。猶記東華年少那門相。

戀繡衾

銀鴛金鳳畫暗銷。曉簾攏新翠漸交。算多少相思恨。被東風吹上柳梢。
羅窗夜夜梨花瘦。奈月明香夢易消。便儂倩題紅句。趁落花流過謝橋。

謁金門

春欲去。無計得留春住。縱著天涯渾柳絮。春歸還有路。恨殺多情杜宇。
愁殺無情風雨。春自悠悠人自苦。鶯花誰是主。

菩薩蠻

杏花枝上鶯聲嫩。鳳屏倦倚人初困。金獸莫添香。香濃情轉傷。雲

沈歸鴈杳。綠漲江南草。獨倚夕陽樓。雙帆何處舟。

青玉案

採蓮女

涼亭背倚斜陽樹。過幾陣菰蒲雨。自棹輕舟穿柳去。綠裙紅袂。與花相似。撐入花深處。妾家住在鴛鴦浦。妾貌如花被花妒。折得花歸嬌厮覷。花心多怨。妾心多恨。勝似蓮心苦。

戀繡衾

多情無語斂黛眉。寄相思偏仗柳枝。待折向樽前唱。奈東風吹做絮飛。歸來醉抱琵琶睡。正酒醒香盡漏移。無賴是梨花夢。被月明偏照帳兒。

南歌子

懶傍青鸞鏡。慵簪翠鳳翹。玉屏春重寶香銷。因甚不忺梳洗。怕登樓。載酒垂楊浦。停橈杜若洲。傷春情緒寄箜篌。流水殘陽芳草伴人。

愁。

醉桃源

東風開到坼桐花。遊蜂初報衙。獸環微掩是誰家。瑣窗金繡紗。環
珮小領巾斜。綠雲雙髻鴉。佯羞無限託琵琶。笑拈萱草芽。

清平樂

鳳城春淺。寒壓花梢顫。有約不來梁上燕。十二繡簾空捲。去年共
倚鞦韆。今年獨倚闌干。誤了海棠時候。不成直待花殘。

謁金門

春又晚。枝上綠深紅淺。燕語呢喃明似翦。采香人漸遠。草色池塘
碧軟。絲竹誰家坊院。拂拂和風初著扇。情峰愁不展。

浣溪沙

楊柳煙深五鳳樓。繡簾風颺玉梭毬。夜寒誰伴錦香篝。殘月有情

圓曉夢。落花無語訴春愁。寶笙偷按小梁州。

鷓鴣天

誰向瑤臺品洞簫。碧虛浮動桂花秋。風從簾幕吹香透。人在闌干待
月高。金粟地。檠珠樓。珮雲襟露玉迢遙。仙娥已有玄霜約。便好騎
鯨上九霄。

謁金門

風不定。吹漾一簾波影。歸燕無期春正永。海棠眠未醒。 箏鴈別來
誰整。好夢不堪重省。閒看鴛鴦交素頸。凭闌襟袖冷。

朝中措

欲晴又雨雨還晴。時節又清明。紅杏牆頭燕語。碧桃枝上鶯聲。 輕
衫短帽。扁舟小棹。幾度旗亭。鬪草踏青天氣。買花載酒心情。

小重山

岸柳黃深綠漸饒。林塘初雨過。漲蒲萄。秋千亭榭綵旗交。鶯聲裏。春在杏花梢。慵整翠雲翹。眉尖愁兩點倩誰描。斜陽芳草暗魂銷。東風遠。猶凭赤闌橋。

霜天曉角

元霜絳雪。散作秋林纈。昨夜西風吹過。最好是睡時節。香絕。高處折。中秋還有月。此際人閒天上。是兩箇廣寒闕。

糖多令

桂邊
偶成

明月可中庭。蕭蕭絡緯聲。畫闌秋玉宇無塵。千樹吹香涼似水。消不盡。許多情。欲醉醉還醒。欲吟吟未成。撚金英。二嗅微馨。應有乘鸞天上女。隨風露下青冥。

柳梢青

和逸禪
四首

蘚蹟苔痕。香浮硯席。影蘸吟樽。雪正商量。同雲淡淡。微月昏昏。孤

山往事誰論。但招得逋仙斷魂。客裏相逢。數枝驛路。千樹江村。

又

沁月凝霜。精神好處。曾悟花光。帶雪煎茶。和冰釀酒。聊潤枯腸。花小立疎廊。道是雪如何。幾度巡簷。一枝清瘦。疑在篷窗。

看

又

菊謝東籬。問梅開未。先問南枝。兩檠三花。松邊傍石。竹外臨溪。前暗憶年時。算笛裏關情是伊。何遜風流。林逋標致。一二聯詩。

樽

又

片片花飛。風前疎樹。雪後殘枝。剗地多情。帶將明月。來伴書幃。寒心事誰知。向籬落微寒半畝。添得閒愁。酒將闌處。吟未成時。

歲

思佳客

和俞菊坡
海棠韻

簇簇紅雲冷欲凝。東風特地喚花醒。數枝夜色當銀燭。一段春嬌入

畫屏。如有恨。似多情。柳邊鶯語十分明。柳邊鶯語如何說。莫笑梅花太瘦生。

糖多令

秋暮有感

休去採芙蓉。秋江煙水空。帶斜陽一片征鴻。欲頓閑愁無頓處。都著在。兩眉峰。心事寄題紅。畫橋流水東。斷腸人無奈秋濃。回首層樓歸去闌。早新月。掛梧桐。

壽詞

瑞龍吟

壽吳丞相

雙溪野。重見種玉鋤雲。采花研露。遙知綠野芳濃。錦堂燕子。迎門共舞。近前語。還問去年山館。舊經行處。西風千里驚鴻。水邊上苑。梅英乍吐。幾度月昏霜曉。望馳天北。驛傳湘渚。冷豔暗香。春寒剗地清苦。看看翠幄。青子江頭路。纔收盡蠻烟瘴雨。初回輕暑。便憶南園趣。

喚人況有多情杜宇。此計非遲暮。都付與和羹。功成歸去。梅榴院落。長逢重午。

渡江雲

壽蔡泉使

桐花寒食近。青門紫陌。不禁綠楊煙。正長眉仙客。來向人間。聽鶴語溪泉。清和天氣。爲栽培種玉心田。鶯晝長一尊芳酒。容與看芝山。庭閒。東風榆莢。夜雨苔痕。滿地欲流錢。愛牆陰成蹊桃李。春自無言。殷勤曉鵲凭簷喜。丹鳳下紅藥堦前。蘭砌繞。香飄舞袖爛熳。

八聲甘州

壽蔡泉憲

兩臺簾對捲。燕芹香。風花近清明。望春瀾柳際。流紅水暖。布穀天晴。誰信閒襟似水。時憶語溪畊。襟抱番江闊。雲遠波平。靜晝輕揮玉塵。見春扉草綠。暮冶煙青。問清華姓字。幾度錄虬屏。看西湖一汀鴛鷺。正曉風殘月兩三星。早歸來赴花魚宴。官樹聞鶯。

三犯渡江雲

舊平聲。今改入聲。爲竹友謝少保壽。

風流三逕遠。此君澹薄。誰與伴清足。歲寒人自得。傍石鋤雲。閒裏種蒼玉。琅玕翠立。愛細雨疎煙初沐。春晝長。秋聲不斷。洗紅塵凡俗。高獨。虛心共許。澹節相期。幾人閒棋局。堪愛處。月明琴院。雪晴書屋。心盟更許青松結。笑四時梅樊蘭菊。庭砌曉。東風旋添新綠。

過秦樓

壽建安使君謝右司

穀雨收寒。茶煙颺曉。又是牡丹時候。浮龜碧水。聽鶴丹山。綵屋幔亭依舊。和氣縹緲。人閒滿谷紅雲。德星呈秀。向東風種就。一庭蘭茁。玉香初茂。遙想曲度嬌鶯舞。低輕燕。二十四簾芳晝。清溪九曲。上巳風光。鶻詠似山陰否。翠閣凝清。正宜淪茗銀鬢。熨香金斗。看雙鸞飛下。長生殿裏。賜薔薇酒。

醉蓬萊

壽越帥謝恕齋

正槐龍欲老。影動朱門。薰風簾捲。竹外人清。聽秋聲將轉。夢草池塘。種蘭庭砌。爽氣生葵扇。香染黃扉。律調翠簡。賞音清燕。因念南陽。碧幢煙靜。綸玉宣煩。纒絲催遣。帶錫犀虹。寵下甘泉殿。笑指蓬萊。畫舸東去。向五雲蔥蒨。騎竹歡迎。賀家湖上。綠香紅茜。

法曲獻仙音

壽雲谷
謝秘撰

風籟晴暄。晝桐陰早。燕閣新香時度。心月樓臺。帶山城郭。西湖翠嬌紅嫵。甚愛此閑中趣。尋盟舊鷗鷺。共容與。倚闌干。靜看飛絮。吟嘯裏。簾捲暖煙霽雨。向一碧玻璃。幾東風呼棹來去。秀玉芳蘭。伴絲簧。庭院笑語。漸梅霖清潤。喜近槐扉初暑。

八聲甘州

代蔡泉使
壽丁丞相

簾垂鷗尾閣。桂花風。天香滿黃扉。向鬱羅霄漢。朝回金闕。心運璇璣。一點元台初度。八表共清輝。紫塞煙塵靜。捷羽東飛。此際錢塘江

上。愛月仍夜色。潮正秋期。想波仙冰妹。同日宴瑤池。報龍樓玉音宣。勸。賜紫金杯。泛日中葵。慶千秋醉長生酒。歌太平詩。

蘭陵王

辛酉代壽壑翁
丞相母夫人

楚天碧。秋晚塵清禁陌。朝雞靜。班退曉墀。回馬金門漏猶滴。千官佩如織。來作黃扉壽客。黑頭相玉虹紫貂。親奉春慈拜南極。叢萱燕堂北。正靄護犀帷。香泛鮫額。瑤池女伴駐鸞翼。擁歌袖籠翠。舞鞦鋪錦。屏開家慶怎畫得。想人在仙宅。今夕。是何夕。正月滿槐廳。涼透檣席。黃花滿地弄寒色。喜蛩雨初霽。鴈風又息。龍樓宣勸。萬歲裏。宴太液。

木蘭花慢

丙辰壽
葉制相

江南春宜早。問誰是。百花魁。過攬桂寒蓉。紉蘭采菊。獨許寒梅。陽和漸回澗底。向水西先放一枝開。瀟灑纖瓊瘦玉。化工月翦雲裁。詩

催。付與雪襟懷。消得暗香來。算知心惟有青松瘦竹。白石蒼苔。年年上林勝賞。撚清芳。蘸入紫金杯。須信和羹未晚。歲寒聊自徘徊。

摸魚兒

壽葉
制相

過重陽晚香猶耐。江城風露初峭。梅花已索巡簷笑。春入數枝紅小。寒恁早。正簾捲蒼雲。和氣生芝草。金虬篆鼻。喜人樂豐年。波澄瀚海。星斗煥牙纛。家山近。遊宴十洲三島。石橋詩思頗遠。朱顏白髮神仙樣。誰信玉關人老。春漸好。望閭闔天低。咫尺瞻黃道。祥雲縹緲。看柳色沙堤。鶯聲禁輦。鳴珮鳳池曉。

漢宮春

壽鄉帥范尙書。郡有蒼雲堂。因古柏得名。

簾捲蒼雲。愛初翔鳳尾。忽駕虬枝。青青歲寒自保。越樣清奇。參天溜雨。帶疎苔密。蘚芳蕤。天賦與凌霜傲雪。臞然山澤風姿。他年棟梁共許。記雪山巫峽。曾賦新詩。庭前可人翠幄。蔥蒨煙霏。高標勁節。有

青松綠竹心知。來試倚摩挲黛色。一樽相祝齊眉。

漢宮春

庚午歲壽
谷翁保相

春滿芝田。正鶴飛空靄。龜引清漣。祥雲滿谷縹緲。非霧非煙。鶯花燕
柳。占年年三月長安。天氣好新聲暖響。東風十二雕闌。蔥蒨獸爐
香裊。映金貂玉珮。綠鬢朱顏。何妨買花載酒。日日湖邊。煙光萬頃。恁
清閒纔是神仙。芳晝永珠簾靜捲。悠然相對南山。

風入松

壽恕齋
謝待制

西清人住水雲鄉。心靜日偏長。閑中自樂壺天趣。笑紅塵誰是羲皇。
疊嶂雙溪。爭似西湖。雨色晴光。碧龜巢處藕花香。波影浸書牀。庭
前一種紅蘭樹。薰風又吹長。瑤芳竹外椿前舞綵。柳邊槐底鳴璫。

西湖明月引

壽雲谷
謝右司

朝回花底曉星明。瑞煙凝。暖風輕。修禊湔裙時節。又聞鶯。綽約岸桃

堤柳近。波萬頃。碧琉璃。鏡樣平。仙翁佩襟秋水清。渺蓮舟。浮翠瀛。
御樓香近。東風裏吹下青冥。鮫纈圍紅。春在牡丹屏。日正遲遲人正
酒。畫簾外。一聲聲。賣放生。

臨江仙

壽千
八兄

門外湖光清似玉。雨桐煙柳扶疎。愛閑吾亦愛吾廬。爐香心在在。杯
酒樂如如。有子專城纔四十。諸孫顆顆明珠。傳家衣鉢祇詩書。一
坡存菊意。千歲學松癯。

少年遊

壽雲谷
謝右司

光風懷抱玉精神。不染世閒塵。香暖衣篝。歌題綵扇。清似晉時人。
柳邊小駐朝天馬。一笑領佳賓。簾捲湖山。花園樽俎。同醉碧桃春。

鷓鴣天

壽表兄
鄭可大

四壁圖書靜不譁。裏湖深處隱人家。斑衣自鬪百家綵。烏帽親裁

一幅紗。新釀酒。旋烹茶。半溪霜月正梅花。庭前手種紅蘭樹。看到
春風第二芽。

霜天曉角

壽疎清
陳別駕

月樹風枝。孤山兩字詩。來到十洲三島。香得更十分奇。陽和。遲自
遲。冰霜欺怎欺。且伴歲寒人醉。有移種玉堂時。

日湖漁唱補遺目錄

應天長

品令

芳草渡

定風波

荔枝香

荔枝香近

四園竹

側犯

六么令

垂楊

西平樂

宴清都

氏州第一

還京樂

拜星月慢

綺寮怨

尉遲杯

西河

選冠子

蘭陵王

瑞龍吟

浪淘沙慢

日湖漁唱補遺

應天長 和周美成韻

流鶯喚夢。芳草帶愁。東風料峭寒色。又見杏漿錫粥。家家禁煙食。江湖幾年倦客。曾慣識。淒涼岑寂。苦吟瘦。蕭索詩腸。空媿郊籍。春事正溪山。柳霧花塵。深映翠蘿壁。更謝多情雙燕。歸來舊庭宅。晴絲亂遊巷陌。悵容易。萬紅塵迹。酒旗直。綠水橋邊。猶記曾識。

品令

玉壺塵靜。蟾光透一簾疎影。偏愛水月樓臺近。畫簾獨倚。風度寒香陣。猶記曲江煙水恨。歎淒涼誰問。夜深沙嘴霜痕印。嚼花拌醉。枝上春無盡。

芳草渡

芳草渡。漸迤邐。分飛。鴛鴦鳳侶。灑一枝香淚。梨花寂寞春雨。惜別情

思苦。匆匆深盟訴。翠浪遠。六幅蒲帆。縹緲東去。夕陽冉冉。淚逐潮回。南浦路。漫空念歸來燕子。雙棲舊庭戶。市橋細柳。尙不減少年張緒。漸瘦損。嬾照秦鸞對舞。

定風波

慵拂粧臺懶畫眉。此情惟有落花知。流水悠悠春脈脈。閒倚繡屏。獨自立多時。有約莫教鶯解語。多愁却妒燕子飛。一笑薔薇孤舊約。載酒尋歡。因甚嬾支持。

荔枝香

次周美成韻

杜宇聲聲頻喚。春漸去。暗碧柳色依依。湖上迷香霧。殘香淨洗紅蘭。昨夜朱鉛兩。金泥帳底。雙虬自沈乳。天際漸迤邐。片帆南浦。一笑薔薇。別後酒杯慵舉。江上琵琶。莫遣東風誤鸚鵡。淚擁通宵蠟炬。

荔枝香近

英風卷芳草。怨碧。王孫漸遠。錦屏夢回恍覺。雲雨散。玉瑟無心理。
懶醉瓊花宴。寶釵翠滑。一縷青絲爲君翦。別情誰更排遣。

四園竹

昏昏暝色。亂葉擁雲屏。渚蘭風潤。庭柱露涼。香動秋幃。獨向蘭亭步
月。闌干瘦倚。此情惟有天知。縱如其。黃花時却歸來。因循已誤心
期。爲寫相思寄與。愁拂鸞箋。粉淚盈盈。先滿紙。正寂寞。樓南鴈過稀。

側犯

次周美成韻

晚涼倦浴。素粧薄。試鉛華靚。凝定似一朵芙蓉泛清鏡。輕紈笑自拈。
撲蝶鴛鴦徑。嬌懶金鳳鞵。斜欹翠蟬影。冰肌玉骨。襯體紅綃瑩。還
暗省。青青雙鬢舊潘令。夢想鸞箏。後堂深迥。何日西風。碧梧金井。

六么令

重陽

授衣時節。猶未定寒燠。長空雨收雲霽。湛碧秋容沐。還是鱸肥蟹美。

橡粟村村熟。不堪追逐。龍山夢遠。惆悵田園自黃菊。醉中還念倦
旅。觸景傷心目。羞破帽把茱萸。更憶尊前玉。愁立梧桐影下。月轉迴
廊曲。歸期將卜。西風吹鴈。懶寄斜封但相囑。

垂楊 本意

銀屏夢覺。漸淺黃嫩綠。一聲鶯小。細雨輕塵。建章初閉東風悄。依然
千樹長安道。翠雲鎖玉窗深窈。斷橋人空倚斜楊。帶舊愁多少。還
是清明過了。任煙縷露條。碧纖青嫋。恨隔天涯。幾回惆悵蘇隄曉。飛
花滿地誰爲婦。甚薄倖隨波縹緲。縱啼鴉不喚春歸。人自老。

西平樂

泛梗飄萍。入山登陸。迢遞霧迴煙賒。漠漠蒹葭。依依楊柳。天涯總是
愁遮。歎寂寞塵埃滿眼。夢逐孤雲縹緲。春潮帶雨。鷗迎遠敵。鴈別平

沙。寒食梨花素約。腸斷處對景暗傷嗟。晚鐘煙寺。晨雞月店。征謁
蕭疎。破帽欹斜。幾度微吟馬上。長嘯舟中。慣踏新豐巷陌。舊酒猶香。
憔悴東風自歲華。重憶少年。櫻桃漸熟。松粉初黃。短楫歡呼。日日江
南。煙邨八九人家。

宴清都

聽徹南樓鼓。玉壺冰漏遲度。重溫錦幄。低護青氈。曲通朱戶。巡簷細
嚼寒梅。歎寂寞孤山伴侶。更信有鐵石心腸。廣平幾度曾賦。寒深
試擁羊裘。松膠自酌。誰伴吟苦。摩挲醉眼。闌干相拍。白鷗驚去。梁園
勝賞重約。漸玉樹瓊花處處。怕柳條未覺春風。青青在否。

氏州第一

閒倚江樓。涼生半臂。天高過鴈來小。紫芡波寒。青蕪煙淡。南浦雲帆
縹緲。潮帶離愁去。冉冉夕陽空照。寂寞東籬。白衣人遠。漸黃花老。

見說西湖鷗鷺少。孤山路醉魂飛繞。荻蟹初肥。尊鱸更美。盡酒懷詩抱。待南枝春信早。巡檐對梅花索笑。月落烏啼。漸霜天鐘殘夢曉。

還京樂

次周美成韻

綵鸞去。適怨清和錦瑟誰共理。奈春光漸老。萬金難買。榆錢空費。岸草煙無際。落花滿地芳塵委。翠袖裏。紅粉濺濺。東風吹淚。任鴛幃底。寶香寒。金獸慵薰繡被。依依別離意味。瓊釵暗劃心期。倩啼鴉爲催行李。黯消魂。但夢繞巫山。情牽渭水。待得歸來後。鏡前深訴憔悴。

拜星月慢

漏閣閒籤。琴窗倦譜。露溼宵螢欲暗。鴈咽涼聲。寂寞芙蓉院。畫簷外。樹色驚霜。漸改淡碧。雲疎星爛。舊約桐陰。問何時重見。倚銀屏更憶秋嬾面。想凌波共立河橋畔。重念酒污羅襦。漸金篝香散。翦孤鐙伴宿西風館。黃花夢對發淒涼歎。但悵望一水家山。被紅雲隔斷。

綺寮怨

滿架酴醾開盡。杜鵑啼夢醒。記曉月綠水橋邊。東風又折柳旗亭。蒙茸輕煙草色。疎簾淨亂。織羅帶青。對一尊別酒。征衫上點滴香淚盈。幾度恨沈斷雲。飛鸞何處。連環尙結雙瓊。一曲琵琶。溢江上慣曾聽。依依翠屏香冷。聽夜雨動離情。春深小樓。無心對錦瑟空涕零。

尉遲杯

長亭路。望渭北漠漠春天樹。殷勤別酒重斟。明日相思何處。晴絲颺暖。芳草外斜陽自南浦。望孤帆影接天涯。一江潮帶愁去。回首杜若汀洲。歎泛梗飄萍。乍散還聚。滿徑殘紅春歸後。猶有楊花亂舞。悵金徽梁塵暗鎖。算誰是知音堪共語。盡天涯夢斷東風。綵雲鸞鳳無侶。

西河

金陵懷古。次周美成韻。

形勝地。西陵往事重記。溶溶王氣滿東南。英雄間起。鳳遊何處古臺空。長江縹緲無際。石頭城上試倚。吳襟楚帶如繫。烏衣巷陌幾斜陽。燕閒舊壘。後庭玉樹委歌塵。淒涼遺恨流水。買花問酒錦繡市。醉新亭芳草千里。夢醒覺非今世。對三山半落。青天數點。白鷺飛來西風裏。

選冠子

倦聽蛩砧。初拋鸞扇。隔浦亂鐘催晚。湘蒲簟冷。楚竹簾稀。窗下乍聞裁翦。倦柳拖煙。枯蓮蘸水。芙蓉翠深紅淺。對半牀鐙光。虛堂淒寂。近書思徧。夜漏永玉宇塵收。銀河光爛。夢斷楚天空遠。婆娑月樹。縹緲仙香。身在廣寒宮殿。無奈離愁亂織。藉酒消磨。倩花排遣。漸江空霜曉。黃蘆漠漠。一聲來鴈。

蘭陵王

古隄直。隔水輕盈颺碧。東風路。還是舞煙眠露。年年自春色。紅塵徧
京國。留滯高陽醉客。斜陽外。千縷垂條。髣髴流鶯度金尺。長亭半
陳迹。記曾繫征鞍。頻護歌席。匆匆江上。又寒食。回首處。應念舊曾攀
折。依然離恨徧西驛。倦遊尙南北。惻惻。怨懷積。漸楚榭寒收。隋苑
春寂。顰眉不盡相思極。想人在何處。倚闌橫笛。閒情似絮。更那聽。夜
雨滴。

瑞龍吟

長安路。還是燕乳鶯嬌。度簾遷樹。層樓十二闌干。繡簾半卷。相思處
處。漫凭佇。因念彩雲初到。鎖窗瓊戶。梨花猶怯春寒。翠羞粉怨。尊
前解語。空有章臺煙柳。瘦纖仍似宮腰飛舞。憔悴暗覺文園。雙鬢
非故。閒拈斷葉。重托殷勤句。頻回首。河橋素約。津亭歸步。恨逐芳塵
去。眩醉眼盡游絲亂緒。腸結愁千縷。深院靜。東風落紅如雨。畫屏夢

繞。一篝香絮。

浪淘沙慢

暮煙愁。鴉歸古樹。鴈過空堞。南浦牙檣漸發。陽關歌盡半闋。恨入迴腸千萬結。長亭柳寸寸攀折。望日下長安近。莫遣鱗鴻成閒絕。淒切。去颿浪遠江闊。悵頓解連環西窗下。對燭頻哽咽。歎百歲光陰。幾度離別。翠消粉竭。信乍圓易散。綵雲明月。浙水吳山重重疊。流蘇帳陽臺夢歇。暗塵鎖孤鸞秦鏡缺。羞人問怕說相思。正滿院楊花落盡東風雪。

日湖漁唱續補遺目錄

如夢令 二

點絳脣 三

浣溪沙 七

清商怨

訴衷情 二

一落索 二

琴調相思引

秋蕊香

月中行

少年遊 三

鳳來朝

迎春樂 三

望江南 二

玉樓春 五

蝶戀花 五

漁家傲

隔浦蓮

解蹀躞

紅林擒近 二

早梅芳

滿路花 二

蕙蘭芳引

華胥引

解語花

意難忘

塞翁吟

法曲獻仙音

滿江紅

掃地遊

滿庭芳

塞垣春

瑣隄寒

丁香結

遶佛閣

渡江雲

水龍吟

選冠子

丹鳳吟

齊天樂

憶舊遊

瑞鶴仙二

慶春宮

夜飛鵲

解連環

一寸金

風流子二

大醜

六醜

日湖漁唱

續補遺目錄

四九

日湖漁唱續補遺

句章 陳 允平 君衡

如夢令

閒倚瑣牕工繡。春困兩眉頻皺。獨自下香街。攀折畫橋煙柳。晴晝。晴晝。偏稱玉樓歌酒。

前調

何處春風歸路。金屋空藏樊素。零亂海棠花。有夢欲隨春去。情緒。情緒。粉濺兩行冰筍。

點絳脣

眉葉顰愁。淚痕紅透蘭襟潤。鴈聲將近。須帶平安信。獨倚江樓。落葉風成陣。情懷悶。蝶隨蜂趁。滿地黃花恨。

前調

分袂情懷。快風一箭輕帆舉。暮煙雲浦。芳草斜陽路。朝
暮潮來去。空凝佇。小蠻樊素。金屋春深處。輪與閒鷗。朝

前調

鶯語愁春。海棠風裏臙脂雨。酒杯慵舉。閒撲亭前絮。漠漠斜陽截
斷愁來路。凭闌佇。滿懷離苦。分付南樓鼓。

浣溪沙

自別蕭郎錦帳寒。鳳樓日日望平安。杏花枝上露纔乾。眉皺但嫌
鈿翠墮。臂銷惟覺釧金寬。薄情楊柳帶征鞍。

前調

一枕華胥夢不成。碧筩香潤玉醪傾。日長花影過池亭。雪藕臂寒
鸚鵡怯。採菱歌發鷺頻驚。白蘋洲上雨初晴。

前調

鬪鴨闌干燕子飛。一堤春水漾晴暉。女郎何處踏青歸。
銷鳳穩。碧羅衫子唾花微。後期應待牡丹時。

生色鞦兒

前調

六幅蒲帆曉渡平。一江星斗漸西傾。離家纔是兩三程。
如喚客。樹頭春鳥自呼名。五雲深處錦官城。

酒外野花

前調

柳底征鞍花底車。兩行香淚溼紅襦。別來鶯燕已春餘。
愁獨倚。笙歌庭院醉誰扶。倦簾閒看玉蟾蜍。

梳洗樓臺

前調

十二珠簾繡帶垂。柳煙迷暗楚江涯。自攜玉笛凭丹梯。
凝粉淚。踏青鴛鴦鞦濺金泥。落紅深處乳鶯啼。

寫恨鸞箋

前調

睡起瞢騰小篆香。素紈輕度玉肌涼。竹深荷靜少炎光。雨過亂蟬嘶古柳。日斜雙鷺立閒塘。更將心事自商量。

清商怨

南枝春意正小。籬菊都荒了。帳底孤燈。夜來還獨照。沙洲煙翠渺。謝塞鴻頻帶書到。笑撚梅花。今年開較早。

訴衷情

綠雲鳳髻不收盤。情味勝思酸。曉色露桃煙杏。空照臉霞丹。花漸老。鏡臺閒。錦爛斑。怨紅一葉。流水東風。好去人閒。

前調

嫩寒侵帳弄微霜。客淚不成行。料得黃花憔悴。何日賦歸裝。樓獨倚。漏聲長。暗情傷。淒涼况味。一半悲秋。一半思鄉。

一落索

欲寄相思愁苦。倩流紅去。淚花寫不斷離懷。都化作無情雨。渺渺暮雲江樹。溪煙橫素。六橋飛絮夕陽西。總都是春歸處。

前調

淡淡雙蛾疎秀。爲誰頻皺。落花何處不春愁。料不是因花瘦。錦字香牋封久。鱗鴻稀有。舞腰銷減不禁愁。怕一似章臺柳。

琴調相思引

金谷園林錦繡香。蹋青挑菜又相將。鳳臺人遠。離思入三湘。花著雨添紅粉重。柳隨風曳碧絲長。薄情鶯燕。春去怎商量。

秋蕊香

和清真韻

晚酌宜城酒暖。玉軟嫩紅嬌面。醉中窈窕度嬌眼。不識愁深愁淺。繡牕一縷香絨線。繫雙燕。海棠滿地夕陽遠。明月笙歌別院。

月中行

又一體

鬢雲斜插映山紅。春重淡香融。自攜紈扇出簾櫳。花下撲飛蟲。
薔架底偏宜酒。纖纖自引金鍾。倦歌佯醉倚東風。愁在落紅中。
薈

少年遊

斜陽冉冉柳邊樓。珠箔水晶鉤。拍點紅牙。簾吹紫玉。低按小梁州。
雙鸞已誤青樓約。誰伴月中遊。倦蝶殘花。寒螢落葉。長是替人愁。

前調

畫樓深映小屏山。簾幙護輕寒。比翼香囊。合歡羅帕。都做薄情看。
如今已過梨花雨。何處殢歸鞍。待約青鸞。彩雲同去。飛夢到長安。

前調

翠羅裙解縷金絲。羅扇掩芳姿。柳色凝寒。花情殢雨。生怕踏青遲。
碧紗牕外鶯聲嫩。春在海棠枝。別後相思。許多憔悴。惟有落紅知。

鳳來朝

百媚春風面。鳳簫吹六么舞徧。玉鸞釵半溜烏雲亂。悄疑是夢中見。
曲歇弓彎袖斂。繡芙蓉香塵未斷。買一笑千金拌。共醉倚畫屏暖。

迎春樂

垂楊影下黃金屋。東風漸粉香熟。恨當年有約。驂鸞速。誤一枕紅雲
宿。帶眼寬移腰似束。怪何事褪紅銷綠。背面立秋千。羞人問。連環
玉。

前調

江湖十載疎狂跡。紅塵裏倦遊客。駐雕鞍問柳東風陌。花底帽。任欹
側。斗酒百篇呼太白。傲人世醉中一息。何日賦歸來。水之南。雲之
北。

前調

依依一樹多情柳。都未識行人手。對青青共結同心就。更共飲。旗亭

酒。褥上芙蓉鋪軟繡。香不散。綵雲春透。今歲又相逢。是燕子。歸來後。

望江南

嬌灼灼。聰雋在秋波。六幅湘裙拖細縠。一鉤塵襪翦輕羅。春意動人多。臨寶鏡。石黛拂修蛾。燕子樓頭蝴蝶夢。桃花扇底竹枝歌。楊柳月婆娑。

前調

煙漠漠。湖外綠楊堤。滿地落花春雨後。一簾飛絮夕陽西。梁燕落香泥。流水恨。和淚入桃蹊。鸚鵡洲邊鸚鵡恨。杜鵑枝上杜鵑啼。歸思越悽悽。

玉樓春

東風躍馬長安道。一樹櫻桃花謝了。別來千里夢頻歸。醉裏五更愁

不到。江南兩岸無名草。雨過莓苔生嫩葆。玉樓人遠六么閒。簾幙深沈雙燕老。

前調

粉銷香滅紅蘭淚。總是文君初別意。春風織就悶情懷。夜月砌成愁况味。迢迢歸夢頻東里。堪恨洛陽花漸已。斜陽日日自相思。三十六陂芳草地。

前調

西園鬪結秋千了。日漾游絲煙外裊。小橋楊柳色初濃。別院海棠花正好。粉牆低度鶯聲巧。薄薄輕衫宜短帽。便拌日日醉芳菲。未必春風留玉貌。

前調

柳絲挽得秋光住。腸斷驛亭離別處。斜陽一片水邊樓。紅葉滿天江

上路。來鴻去鴈知何數。欲問歸期朝復暮。晚風庭院倚闌干。兩岸蘆花飛雪絮。

前調

長江浩渺山明秀。宛轉西風驚客袖。相逢纔繫柳邊舟。相別又傾花下酒。怪得新來詩骨瘦。都在秋娘相識後。一天明月照相思。蘆荻汀洲霜滿首。

蝶戀花

柳四首。次周美成韻。

謝了梨花寒食後。剪剪輕寒。曉色侵書牖。寂寞情懷如中酒。攀條恨結東風手。淺黛嬌黃春色透。薄霧輕烟。遠映蘇堤秀。目斷章臺愁舉首。故人應似青青舊。

前調

牆外鞦韆花影後。環獸金懸。暗綠籠朱牖。爲怯輕寒猶殢酒。同心共

結懷纖手。粉袖盈盈香淚透。蹙損雙眉。懶畫遙山秀。柔弱風條低
拂首。渭城歌舞春如舊。

前調

寂寞長亭人別後。一把垂絲。亂拂閒軒牖。三月春光濃似酒。傳杯莫
放纖纖手。金縷依依紅日透。舞徹春風。不減蠻腰秀。撲鬢楊花如
白首。百年張緒心如舊。

前調

落盡櫻桃春去後。舞絮飛絲。撲簌穿簾牖。惜別情懷愁對酒。翠條折
贈勞纖手。繡幕深沈寒尙透。雨雨晴晴。裝點西湖秀。悵望章臺愁
轉首。畫闌十二東風舊。

前調

次周美
成韻

樓上鐘殘人漸定。庭戶沈沈。月落梧桐井。悶倚瑣牕燈炯炯。獸香閒

伴銀屏冷。浙瀝西風吹雁影。一曲秋笳。別後誰堪聽。誓海盟山虛話柄。憑書問著無言應。

漁家傲

日轉花梢春已晝。雙娥曲理遙山秀。百草偏輸羞不鬪。隨人後。無情自折金絲柳。秋水盈盈嬌欲溜。六么倦舞弓彎袖。偷摘青梅推病酒。徘徊久。一雙燕子歸時候。

隔浦蓮

次周美成韻

鉛霜初褪鳳葆。碧茄侵雲窈。萬綠傷春。遠林幽樂多禽鳥。斜陽堤畔草。游魚鬧。暗水流萍沼。翠鈿小。涼亭醉倚。接羅巾任敬倒。月明庭樹。夜半鵲飛驚曉。隔岸蘋鄉夢漸到。吹覺一襟風露塵表。

解蹀躞

次周美成韻

岸柳飄殘黃葉。尙學纖腰舞。謝他終日亭前伴羈旅。無奈歷歷寒蟬。

爲誰喚老西風。伴人吟苦。悶無緒。記得芙蓉江上。蕭孌舊相遇。如今憔悴黃花慣。風雨把酒東望家山。醉來一枕閒窗。夢隨秋去。

紅林擒近

雪二首。次周美成韻。

飛絮迷芳意。落梅銷暗香。皓鶴唳空碧。白鷗避寒塘。妨他踏青鬪草。便放曉日東窗。先自嬾弄晨粧。誰耐聽笙簧。望帝尋酒市。看釣認漁鄉。控持紫燕。芹泥未上雕梁。想梁園謝館。尋花較晚。但陪玉樹頻舉觴。

前調

三萬六千頃。玉壺天地寒。庾嶺封的皜。淇園折琅玕。漠漠梨花爛漫。紛紛柳絮飛殘。直疑潢潦驚翻。斜風泝狂瀾。對此頻勝賞。一醉飽清歡。呼童翦韭。和冰先薦春盤。怕東風吹散。留尊待月。倚闌莫惜今夜看。

早梅芳

次周美
成韻

鳳釵橫。鸞帶繞。獨步鴛鴦沼。闌干斜倚。自撲精神對花笑。貼衣瓊佩冷。襯鞵金蓮小。捲香茵。縹緲舞袖稱纖妙。夢初成。歡未了。明日青門道。離雲別雨。脈脈無情畫堂曉。柳邊驕馬去。翠閣空凝眺。漸春風綠愁江上草。

滿路花

離歌泣斷雲。別舞愁飛雪。鳳凰臺上望瓊簫絕。釵分玉燕。寸寸回腸折。碧空歸鴈闊。猶有疎梅。歲寒獨伴高節。鮫綃羅帕。淚灑臙脂血。悠悠江上水。天連接。朱樓徧倚。萬里空情切。此恨憑誰說。天若有情。料天須有區別。

前調

寒輕菊未殘。春小梅初破。獸爐閒撥盡松明火。青氈錦幄。四壁新裝

裏。裊暖香薰座。繡擁銀屏。採鸞空伴雲臥。相思何處。夢入藍橋左。
歸期還細數。愁眉鎖。薄情孤鴈。不向樓西過。故人應怪我。怪我無書。
有書還倩誰呵。

蕙蘭芳引

虹雨乍收。楚天霽亂。飛秋鷺。漸秋色衰殘。牆外土花晴綠。故山鶴怨。
流水自菊籬茅屋。日暮詩吟。就澹墨閒題修竹。更憶飄蓬。霜絳風
葛。幾度涼燠。歎歸去來今。何日甬東一曲。黃蘆滿望。白雲在目。但月
明長夜伴人清獨。

華胥引

涵空斜照。掠水輕嵐。滿天紅葉。鴈泊平蕪。鳧依荒荻。聲啞啞。寂寞金
井梧桐。漸轆轤伊軋。明月紗窗。夜寒孤枕應怯。吟老西風。笑衰髯
頓已如鐻。錦箋鄭重。頻別蘭燈自閱。多謝征衫初寄。尚寶香薰篋。愁

憶家山。夢魂飛度千疊。

解語花

上元。次周美成韻。

鼇峰遡碧。貝闕緣雲。挂魄寒光射。鳳檐鴛瓦。星河際。縹緲繡簾高下。笙簫奏雅。愛雪柳蛾兒笑把。瓊珮搖珠翠盈盈。迤邐飄蘭麝。陸地金蓮照夜。富綺羅妝豔。春態容冶。籠紗鞍靶。香塵過紫陌寶車驕馬。遊人靜也。東風裏萬紅初謝。沈醉歸殘角霜天。漸落梅聲罷。

意難忘

次周美成韻

額粉宮黃。襯桃花扇底。歌送瑤觴。裙拖金縷。細衫唾碧花香。瓊珮冷。玉肌涼。羅襪步滄浪。漫共伊心盟意約。眼覷眉相。連環未結雙雙。似桃源誤入。初嫁劉郎。瓏璫仙子髻。綽約道家妝。千種恨九迴腸。雲雨夢猶妨。誤少年紅消翠減。虛度風光。

塞翁吟

次周美成韻

睡起鸞釵。金約鬢影。臙臙。檐佩冷。玉丁東。鏡裏對芙蓉。秦箏倦理。梁塵暗。惆悵燕子樓空。山萬疊。水千重。一葉漫題紅。忡忡。從別後。殘雲斷雨。餘香在。鮫綃帳中。更懊恨。燈花無準。寫幽悵。錦織回文。小字斜封。無人爲託。欲倩賓鴻。立盡西風。

法曲獻仙音

次周美成韻

油幕收塵。素紈招月。一枕蘋香微度。枕玉牙牀。浣冰金斛。薰風夜涼。牕戶。漸睡醒。明河暗。芭蕉幾聲雨。對誰語。念徽容已成憔悴。心期誤。歸計欲成又阻。寂寞燕樓空。想弓彎眉黛。慵懶。淚墨愁牋。縱回文難寫情素。便山遙水邈。幾度夢魂飛去。

滿江紅

目斷江橫。想思字難憑。鴈足。從別後。倦歌慵繡。悄無拘束。煙柳翠迷星眼恨。露桃紅沁霞腮肉。傍瑣窗。終日對文枰。翻棋局。頻暗把。歸

期卜。芳草恨。闌干曲。謝多情。海燕伴愁華屋。明月自圓雙蜨夢。彩雲空伴孤鸞宿。任畫簾不捲玉鉤閒。楊花撲。

埽地遊

次周美成韻

蕙風颺暖。漸草色分吳。柳陰迷楚。寸心似縷。看窺簾燕妥。妒花蝶舞。翦翦愁紅萬點。輕飄淚雨。怕春去。問杜宇喚春歸。歸去何處。後期重細許。倩落絮飛煙障。春歸路。長亭別俎。對歌塵舞地。暗傷蠻素。算得相思。比著傷春又苦。正凭罇。聽殘陽斷橋簫鼓。

滿庭芳

次周美成韻

槐影連雲。竹光團露。小荷新綠浮圓。簞紋如浪。綃帳碧籠煙。迴合溪橋一曲。初雨過。流水濺濺。闌干外。沙鷗野鳥。飛過釣魚船。浮生同幻境。眼空四海。蹟寄三椽。但隨天休問。我後誰前。要識淵明琴趣。真真意都在無絃。薰風裏。綸巾羽扇。一枕北牕眠。

塞垣春

次周美成韻

草碧鋪橫野。帶晚色、吟鞍卸。煙葭露葦。滿汀鷗鷺。人在圖畫。漸一聲鴈過南樓也。更細雨、時飄灑。念微容、都消瘦。謾將紈素描寫。臨鏡理殘粧。依然是京兆柔雅。落葉感秋聲。啼螿歎涼夜。對黃花共說憔悴。相思夢頓醒西牕下。兩腕玉跳脫。素纖慳半把。

瑣牕寒

次周美成韻

禁燭飛煙。東風插柳。萬家千戶。梨花院落。數點弄晴纖雨。傍鞦韆紅雲半溼。畫簾燕子傷春語。歎十年南北。西湖倦客。曲江行旅。日暮。花深處。對修竹彈棋。戲枰格五。攜尊共約。詩酒雲朋月侶。念舊遊九陌香塵。倡條冶葉還在否。踏青歸醉宿蘭舟。枕藉黃金俎。

丁香結

次周美成韻

塵擁粧臺。翠閒歌扇。金井碧梧風隕。聽豈蟲聲小。伴寂寞、冷逼莓牆。

蒼潤。料淒涼宋玉。悲秋恨此際怎忍。蓮塘風露。漸入粉豔紅衣落盡。
句引。記舞歇弓彎。幾度柳圍花陣。酒薄愁濃。霞腮淚漬。月眉香暈。
空對秦鏡尚缺。暗結回腸寸。念纖腰柔弱。都爲相如瘦損。

遶佛閣

次周
成韻

暮煙半斂。雲護淡月。斜照梅館。春夜偏短。一牀耿耿。孤燈晃幃幔。玉
壺漏滿。天外漸覺。歸鴈聲遠。離思悽婉。重懷執手。東風翠蘋岸。料
想鳳樓人。捲繡回文停綵線。顛顛淚積香銷嬌粉面。歎暗老年光。隙
駒流箭。夢中空見。漫惹起相思。芳意迷亂。錦衾重向紗窗展。

渡江雲

次周美
成韻

青青江上草。片帆浪暖。初泊渡頭沙。翠筇便瘦倚。問酒垂楊影裏那
人家。東風未許。漫媚嫵輕試鉛華。飄珮環玉波秋瑩。雙髻綠堆鴉。
空嗟。赤欄橋畔。暗約琴心。傍秋千影下。夜漸分。西牕愁對煙月籠紗。

離情暗逐春潮去。南浦恨風葦煙葭。腸斷處。門前一樹桃花。

水龍吟 梨花

曉鶯啼醒春愁。粉香獨步千紅地。庭閒散編。林空翦雪。鷗鷺鶴避。如月魂淒。行雲夢冷。溫柔鄉閉。漸黃昏院落。清明時候。東風裏。無情淚。織翠玲瓏葉底。倚闌人玉龍休吹。殘粧未洗。芳心微露。昭陽睡起。恨結連環。舞停雙珮。水晶如意。倩蜂媒。娉取。瓊花細與。向尊前比。

選冠子

次周美成韻

翠約蘋香。綠搏槐蔭。隔水晚蟬聲斷。壺冰避暖。釧玉敬涼。倦暑嬾拈歌扇。雲浪縹緲魚鱗。新月開弦。落星沈箭。恨經年。閒闊。柔箋空寄。夢隨天遠。憔悴損臂薄煙綃。腰寬霞縷。錦瑟暗塵侵染。韓香猶在。秦鏡空圓。薄倖舊盟俱變。虛蠹春華。爲誰容改芳徽。魂飛嬌倩。凭危樓望斷。江外青山亂點。

丹鳳吟

次周美
成韻

暗柳烟深何處。翡翠簾櫳。鴛鴦樓閣。芹泥融潤。飛燕競穿簾幕。鞦韆
倦倚。還思年少。鞦韆步塵輕。衫裁羅薄。陡頓芳心暗老。強理新粧。離思
都占眉角。過了幾番花信。曉來剗地寒意惡。可煞東風。堪把天桃
豔杏。故故凌鏢。傷春憔悴。淚觸粉腮香落。條脫金寬雙玉腕。怕人猜
偷握。漸芳草恨。畫閣休傍著。

齊天樂

次周美
成韻

客愁都在斜陽外。凭闌柱香吹晚。亂葉蟬哀。寒汀鷺泊。離緒并刀難
剪。牙屏半掩。漸塵撲冰紉。浪收雲篔。露入征衣。滿襟秋思付詩卷。
還思前度問酒。鳳樓人共倚。歸興無限。雁影亭皋。蛩聲院落。雙闕明
河清轉。田園夢遠。歎籬菊初開。澗尊堪薦。拄笏西風。四山煙翠斂。

憶舊遊

次周美
成韻

又眉峰碧聚。記得郵亭。人別中宵。翦燭西牕下。聽林梢葉墮。霧漠烟
蕭。綵鸞夢逐雲去。環珮入扶搖。但鏡裂鴛鴦。釵分燕股。粉膩香消。
迢迢。舊遊處。向柳下維舟。花底揚鑣。更憶西風裏。採芙蓉江上。雙漿
頻招。怨紅一葉。應到明月赤闌橋。漸淚浥瓊顚。臙脂淡薄羞嫩桃。

瑞鶴仙

故廬原負郭。愛樹色參差。湖光渺漠。樓危萬山落。俯闌干十二。譚檐
飛角。花嬌柳弱。映輕黃淺黛依約。與沙鷗共結新盟。伴我醉眠醒酌。
蕭索雲根石上。淪茗松泉。注書芸閣。鶯窺燕幙。檐外竹圍中藥。念
耕煙釣雪。已成活計。一任風波自惡。但無心萬事由天。夢中更樂。

前調

燕歸簾外捲。正漏約瓊籤。笙調玉琯。蛾眉畫來淺。甚春衫懶試。夜燈
慵翦。香溫夢暖。訴芳心芭蕉未展。渺雙波望極江空。二十四橋凭徧。

蕙情銀屏綵鳳。霧帳金蟬。舊家坊院。煙花弄晚。芳草恨。斷魂遠。對東風無語。綠陰深處。時見飛紅數片。算多情尚有黃鸝。向人睨眴。

慶春宮

次周美成韻

孤鶩披霞。歸鞍銜日。晚香菊自寒城。虛館燈閒。征衫塵浣。夜深何處砧聲。亂蛩催怨。月明裏依稀數星。雲山迢遞。猶誤歸期。方寸偏縈。秋風燕送鴻迎。最憐堤柳。白露先零。倦倚樓高。恨隨天遠。桂風和夢俱清。故人千里。記翦燭西牕賦成。相如顛顛。宋玉淒涼。酒恨花情。

夜飛鵲

次周美成韻

秋江際。天闊風雨淒其。雲陰未放晴暉。歸鴉亂葉更蕭索。砧聲幾處寒衣。沙頭酒初熟。盡籬邊朱槿。竹外青旗。潮期尙晚。怕輕離故故遲遲。何似醉中先別。容易爲分襟。獨抱琴歸。回首征帆縹緲。津亭寂寞。衰草煙迷。虹收霽色。漸落霞孤鶩飛齊。更何時重與。論文渭北。翦

燭應西。

解連環

寸心誰托。望瀟湘暮碧。水遙雲邈。自繡帶同翦。合歡。奈鴛枕夢單。鳳
幃寒薄。淡月梨花。別後伴情懷。蕭索。念傷春漸懶。病酒未收。兩眉無
藥。魂消翠蘭紫若。任釵沈鬢影。香心眉角。悵畫閣塵滿粧臺。但玉
珮依然。寶箏閒卻。舊約無憑。誤共賞西園桃萼。正天涯數聲杜宇。斷
腸院落。

一寸金

次周美
成韻

吾愛吾廬。甬水東西半村郭。試倚樓極目。千山拱翠。舟橫沙觜。江迷
城脚。水滿蘋風作。闌干外夕陽半落。荒煙暝幾點昏鴉。野色青蕪自
空廓。浩歎飄蓬。春江幾度。依依柳邊泊。念水行雲宿。棲遲羈旅。鷗
盟鷺伴。歸來重約。滿室凝塵澹。無心處宦情最薄。何時遂釣笠耕蓑。

靜觀天地樂。

風流子

次周美
成韻

闌干休去倚。長亭外煙草帶愁歸。正曉陰簾幙。綺羅清潤。西風環珮。金玉參差。深院悄。亂蟬嘶夏木。雙燕別春泥。滿地殘花。蝶圓涼夢。半庭落葉。蛩感秋悲。蘭屏餘香在。銷魂處憔悴不勝衣。誰念鳳樓當日。星約雲期。悵倦理鸞箏。朱絃空暗。強臨鴛鏡。錦帶閒垂。別後兩峰眉恨。千里心知。

前調

次周美
成韻

殘夢繞林塘。詩添瘦瘦不似東陽。正流水蕩紅。暗通幽徑。嫩篁翻翠。斜映迴牆。相對握寶箏低度曲。銷蠟艷新簧。鶯懶晝長。燕閒人倦。乍親花簞。慵引壺觴。簾櫳深深地。歌塵靜芳草自碧空廂。十二畫橋。一隄煙樹成行。向杜鵑聲裏。綠楊庭院。共尋紅豆同香。
一本作同春
結丁香

已無多。祇愁風雨相妨。

大酺 次周美成韻

霧縠西山。珠簾捲。濃靄淒迷華屋。蒲萄新綠漲。正桃花煙浪。飛紅翻觸。繡閣留寒。羅衣怯潤。慵理鳳樓絲竹。東風垂楊恨。鎖朱門深靜。粉香初熟。念緩酌燈前。醉吟孤枕。頓成清獨。傷心春去速。歎雙景虛擲如飛轂。漫孤負秋千臺榭。拾翠心期。誤芳菲怨眉愁日。冷透金篝溼。空展轉畫屏山曲。夢不到華胥國。閒倚雕楹。試採青青梅菽。海棠尚堪對燭。

六醜 次周美成韻

自清明過了。漸柳底鶯梭慵擲。萬紅御風。飄飄如附翼。錦繡陳迹。障地香塵暗。飛蜂似雨。漫冶遊南國。蘭襟縹緲辭湘澤。馬跡郊原。燕泥巷陌。傷春爲花深惜。歎芳菲薄倖。容易疎隔。庭閒人寂。空餘芳草

碧。夢裏驚春去如瞬息。長安市上狂客。爲桃源解珮。醉濃歡極。無心
整霧襟煙幘。驚回處斷雨殘雲。倦倚畫闌干側。相思恨暗度流沙。更
杜鵑院落黃昏近。誰禁受得。



燕 喜 詞

曹 冠 撰

本館據別下齋叢
書本排印初編各
叢書僅有此本

研經室外集續提要

燕喜詞一卷。宋曹冠撰。冠字宗臣。號雙溪居士。東陽人。見縣志。此本有淳熙丁未長樂陳鬚及釣臺詹效之二序。文云。檢正曹公。臺省舊人。來游宣幕。太守大監詹公。歎賞其文。刊諸宣城學宮。復以所著樂府。析爲別集。名曰燕喜。今從毛氏汲古閣舊藏本錄出。

燕喜詞序

春秋列國之大夫。聘會燕饗。必歌詩以見意。詩之可歌尚矣。後世陽春白雪之曲。其歌詩之流乎。公襲至今。作之者非一。造意正平。措詞典雅。格清而不俗。音樂而不淫。斯爲上矣。高人勝士。寓意於風花酒月。以寫夷曠之懷。又其次也。若夫宕蕩於檢繩之外。巧爲淫褻之語。以悅俚耳。君子無取焉。議者曰。少游詩似曲。東坡曲似詩。蓋東坡平日耿介直諒。故其爲文。似其爲人。歌赤壁之詞。使人抵掌激昂。而有擊楫中流之心。歌哨遍之詞。使人甘心澹泊。而有種菊東籬之興。俗士則酣寐而不聞。少游情意嫵媚。見於詞則穠艷纖麗。類多脂粉氣味。至今膾炙人口。寧不有愧於東坡耶。同年檢正曹公。文雄學奧。節勁氣巖。三十年臺省舊人也。不辭小試。來遊宣幕。使君大監狀元詹公。既深知之。一見其文集。尤加歎賞。敘而鈔版于郡庠。名之曰雙溪。

因其居也。又以其所著樂府。可歌於閨門之內者。別爲一集。名之曰燕喜。據其實也。方其花朝月夕。少長團樂。尊俎之餘。出而歌之。于以導嘻嘻怡怡之情。佳作樂事。萃于一門。近世之所未有者。鬚淳熙丁未。備倅於此。公餘請問。辱以見教。熟讀三復。玩其辭而繹其意。豈非中有所本歟。吁。寥寥百餘年。繼坡仙之作。非公而誰。中秋前二日。長樂陳鬚敘。

宋廣平鐵心石腸。猶爲梅花作賦。議者疑之。殊不知感物興懷。歸於雅正。乃聖門之所取。而亦何疑於廣平乎。語曰。子與人歌而善。必使反之。而後和之。以見其詳復致意如此。無他焉。善言欲其不妄也。檢正曹公。行兼九德。渾然天成。文章政事。淵源經術。廉介有守。既和且正。太守大監詹公。歎賞其文。摭其大略。而刊諸宣城學官。既有成集矣。復以所著樂府。析爲別集。名曰燕喜。竊嘗玩味之。旨趣純深。中含法度。使人一唱而三歎。蓋其得於六義之遺意。純乎雅正者也。昔王褒爲益州刺史。作中和樂職宣布詩。出於一時歆羨。猶且選好事者。依鹿鳴之聲。習而歌之。至於轉而上聞。漢宣帝褒美之。矧斯作也。和而不流。足以感發人之善心。將有採詩者。播而颺之。以補樂府之闕。其有助於教化。豈淺淺哉。淳熙丁未仲夏望日。宣城丞、鈞臺、詹效之書。

燕喜詞目錄

漢宮春

鳳棲梧 四首

夏初臨 三首

風入松

霜天曉角 三首

喜朝天

二首
踏莎行
翠

浣溪沙 三首

朝中措 二首

和歸去來詞

念奴嬌 四首

西江月 三首

水調歌頭 三首

鷓鴣天

好事近 三首

蘭陵王

宴桃源 二首

惜芳菲

江神子

驀山溪 五首

東坡引

水龍吟

滿江紅 二首

桂飄香 卽花心動

喜遷鶯

八六子

木蘭花慢

柳梢青

哨遍

小重山

滿庭芳

卜算子

粉蝶兒

臨江仙

浪淘沙

定風波

青玉案

使牛子

望海潮

燕喜詞

宋雙溪居士曹 冠字宗臣

漢宮春梅

一品天香似。蔡真仙質。宮額新粧。先春爲傳信息。壓盡羣芳。化工着意。賦陽和欺雪凌霜。應自負孤標介潔。歲寒獨友松篁。因念廣平曾賦。愛浮香隴月。疎影橫窗。真堪玉堂對賞。瓊苑依光。江城塞管。任龍吟吹徹何妨。君看取。和羹事在。收功不負東皇。

鳳棲梧 牡丹

魏紫姚黃凝曉露。國豔天然。造物偏鍾賦。獨占風光三月暮。聲名都壓花無數。峰蝶尋香隨杖屨。現皖鶯聲。州勸遊人住。把酒當春春莫去。玉堂元是常春住。

又 蘭溪

桂棹悠悠分浪穩。煙霧層巒。綠水連天遠。贏得錦囊詩句滿。興來豪飲揮金盃。飛絮撩人花照眼。天闊風微。燕外晴絲卷。翠竹誰家門可款。艤舟閒上斜陽岸。

又

會于秋香閣。適令丞有違言賦此詞勸之。

昨夜西疇新足雨。玉露金飈。着意塵殘暑。畫閣登臨凝望處。餘霞晚照明煙浦。閒是閒非知幾許。物換星移。風景都如故。耳聽是非縈意緒。爭如揮塵談千古。

又

尋芳飲于小圃。元名蝶戀花。

桃杏爭妍韶景媚。雨霽煙輕。山色接藍翠。綠竹青松依澗水。了無一點塵埃氣。忙裏偷閒真得計。乘興攜壺。交飲欣同志。對景揮毫聊寓意。賞花醉月拚深醉。

夏初臨

琴拂虞薰。月裁班扇。麥秋槐夏清和。筍變琅玕。絳榴細蹙香羅。綠雲初展圓荷。見金鱗戲躍清波。山丹舒艷。葵花映日。萱草成窠。浮雲富貴。出處無心。好天風月。如意偏多。用晏元獻公幕府王君玉事功名事業。壯懷豈肯蹉跎。待擁雕戈。洗胡塵。須挽天河。醉揮毫。知音爲我。發興高歌。

又

婺州郡圃

水樹風臺。竹軒梅徑。雙溪新剏名園。極口遐觀。碧岑斂散瑤煙。柳塘風歛清漣。爛紅雲花鳥爭妍。艷粧佳麗。相攜笑歌。學弄秋千。遨頭多暇。命友尋芳。賞心行樂。物態熙然。俚香拾翠。雅宜飛蓋聯翩。滿勸金缸。任玉山頻醉花前。且留連。賞月畫欄。擬鬪嬋娟。

又

淳熙戊戌四月既望。遊涵碧。登生秋冲霄二亭。鷓詠竟日。是日也。初夏恢台園林茂密。瀑泉鏗鏗。松韻笙簫。巒翠波光。上下相映。佳山句在。我思古人。對景興懷。視今猶昔。何異乎蘭亭之感慨也。賦夏初臨一閱。以紀時日。

翠入煙嵐。綠鋪槐幄。薰風初扇微和。茂樾扶疎。絳榴花映庭柯。瀑泉

缸。香風襲綺筵。最後慙慙一瓣。分付與酒中仙。

又

水亭清絕。擁翠環林樾。湘簟賓筵乘興。玉壺酒。漾冰雪。寶獸。沈煙
爇。玉琴聲韻徹。夜永風微煙淡。梧桐影碎明月。

喜朝天

綺霞閣。
卽路莎行。

繡水雕欄。綺霞箋字。薰風颯至清無暑。花間休唱渴雲歌。枝頭且聽
嬌鶯語。景物撩人。悠然得句。深杯戲把紋楸賭。胸中邱壑自生涼。
何須泉石尋佳趣。

又

翠老紅稀。歌慵笑懶。溟濛煙雨秋千院。芹泥帶溼燕雙飛。杜鵑啼訴
芳心怨。座客分題。傳觴迭勸。送春惜別情何限。不須惆悵怨春歸。
明年春色重妍暖。

浣溪沙

柳

翠帶千條蘸碧流。多情不解繫行舟。章臺惜別恨悠悠。
溼雨傷春眉黛斂。倚風無力舞腰柔。絲絲煙縷織離愁。

又

槐柳風微軒檻涼。芙蓉綠葉映池光。幾多飛蓋擁紅粧。
泉試雲籠花乳泛。袖籠寶鼎水沈香。紋楸戲戰賭霞觴。

又

雁字鱗差印碧空。淡雲縈縷媚遙峯。悠颺舒卷逐西風。
煙鎖綠楊深院靜。花前寓意勸金鍾。鳳簫一曲月明中。

朝中措

茶

春芽北苑小方珪。碾畔玉塵飛。金筋春葱擊拂。花蕊雪乳珍奇。
主人情重。留連佳客。不醉無歸。邀住清風兩腋。重斟上馬金卮。

又編

更闌月影轉瑤臺。歌舞下香階。洞府歸雲縹緲。主賓清興徘徊。湯
斟崖蜜。香浮瑞露。風味方回。投轄高情無厭。抱琴明日重來。

和陶淵明歸去來詞

歸去來兮。雲林可樂胡不歸。既明乎否泰倚伏。夫何喜而何悲。羨飛
黃之逐電。策駑蹇而欲追。想傍觀而必哂。予亦自知其非。擬列鼎於
梓茹。等狐裘於鶉衣。觀大道之微妙。講羣經之精微。設科授業。來者
如奔。戶屢雲集。車轍盈門。軒冕儻來。良貴中存。南陽高臥。北海開樽。
奉萱堂而戲綵。溢喜色於慈顏。家雖貧而歡足。心無累而常安。遊西
園以容與。聽鶯鳴之間關。悅濠梁之魚泳。邀惠子而同觀。對明月以
觴詠。與清風而往還。蘊平戎之膽略。尙壯心之桓桓。歸去來兮。余嘗
夢於仙遊。悟榮歿之舊班。奚逐物而他求。濯清泉以自潔。樂簞瓢以

無憂。野毗告予以木秀。盍往觀乎農疇。籃輿有馭。竹溪有舟。攜子姪以同賞。閒步屨於亭邱。容萬象於度內。覺吾心之休休。已矣乎。進德修業欲及時。辰乎去速不可留。流行坎止隨所之。勳業存乎命。窮通難預期。壁寸陰以汲古。耕藝苑而耘耔。遠聲色以自壽。翫光景而哦詩。韞良玉以待價。無心任運亦何疑。

念奴嬌

宋玉高唐賦。述楚懷王遇神女事。後世信之。愚獨以爲不然。因賦念奴嬌。洗千載之誣。以祛流俗之惑。

蜀川三峽。有高唐奇觀。神仙幽處。巨石巉巖。巖臨積水。波浪轟天聲怒。十二靈峯。雲堦月地。中有巫山女。須臾變化。陽臺朝暮雲雨。堪笑楚國懷襄。分當嚴父子。胡然無度。幻夢俱迷。應感逢魑魅。虛言冥遇。女恥求媒。况神清直。豈可輕誣汗。逢君之惡。鄙哉宋玉詞賦。

又縣圃達觀

賞嚴柱

金鷗習暑。覺庭梧湘簟。涼生秋意。玉露宵零。仙掌潔。雲捲碧天如水。

銀漢波澄。蟾光練靜。依約山橫翠。清商佳景。笑他宋玉憔悴。堪笑
利鎖名韉。向蝸牛角上。所爭何事。四者難并人易老。惟有修真得計。
榮悴循環。功名由命。達觀明深旨。桂花同賞。莫辭通夕歡醉。

又述懷和趙宰通甫韻

天津仙客。話平蔡曾把龍鍾調戲。

裴度未達。嘗遊天津橋。或言蔡州未平。一老父指度曰。必待此人。度

笑曰。見我龍鍾。故相調戲。

茅舍雲林方隱迹。日月琴樽適意。鵬激天池。扶搖未便。

尚歛摩雲翅。經綸萬卷。箇中真負豪氣。喜遇良友知心。登臨酬唱。
堪作詞林瑞。况是韶華將近也。待約連宵春醉。對客揮毫。如虹浩飲。
爭湧如泉思。同寅他日。誓堅忠義相濟。

又詠中秋月

碧天如水。湛銀潢清淺。金波澄澈。疑是姮娥將寶鑑。高挂廣寒宮闕。
林葉吟秋。簾櫳如畫。丹桂香風發。年年今夕。庾樓此興清絕。因念

重折高枝。壯心猶鬱。已覺生華髮。好向林泉招隱處。時講清遊眞率。乘興歌歡。熙然朝野。何日非佳節。百杯千首。醉吟長對風月。

西江月

秋香閣

仙掌初零玉露。清商乍肅金飈。回環高閣桂香飄。元自廣寒移到。絳蠟銀蟾輝映。綸巾鶴氅逍遙。賞心樂事醉良宵。贏得開懷吟獻。

又

示忠彥

秋霽姮娥二八。寒光逼散浮雲。小山叢桂唾清芬。猶帶蟾宮風韻。因念兩登仙籍。恩霑雨露方新。汝今妙歲已能文。早折高枝榮奮。

又

泛舟

一派灣溪曲港。兩山松榦檉蘿。尋幽乘興泛煙波。時見白鷗飛過。炫日浪紋金影。連雲岸草青莎。陶然一醉養天和。解意歌鶯勸我。

水調歌頭

遊三祠

我本方壺客。飄逸離凡塵。胸中萬卷。談笑揮翰筆通神。不慕巢由隱迹。不羨臯夔功業。出處兩無心。坦蕩靈臺淨。塵隱勝雲林。念生平。喜曠達。事幽尋。登臨舒嘯。惟有風月是知音。雅愛金華仙洞。一派蒼崖飛瀑。回序景嘗新。遐想赤松子。來爲醒仲襟。

又紅梅

造物巧鍾賦。新蠟報花期。江梅清瘦。只是潔白逞芳姿。我欲超羣絕類。故學仙家繁杏。穠艷映橫枝。朱粉膩香臉。酒暈着冰肌。玉堂裏。山驛畔。最希奇。誰將絳蠟籠玉。香雪染臙脂。好向歌臺舞榭。鬪取紅粧嬌面。偎依韻偏宜。羌管莫吹動。風月正相知。

又

遊燕賞潭洞。舒嘯對雲峯。瀑泉飛下。銀漢一水淨涵空。前度劉郎詩句。祇咏丹青摹寫。佳境未親逢。

劉禹錫寄題涵碧詩。有遠寫丹青列雍州之句。

爭似我吟賞。

攜酒屢從容。濯塵纓。揮羽扇。快薰風。因思往古遊者。清興與今同。泉石因人輕重。峴首名傳千古。登覽賴羊公。陵谷有遷變。勳烈耀無窮。

鷓鴣天 夢仙

我昔蓬萊侍列仙。夢遊方悟絆塵緣。青春放浪迷詩酒。黃卷優游對聖賢。嘲水石。詠雲煙。乘風欲往思泠然。要知昨夜方壺景。只在芸齋杖屨前。

好事近 巖桂

蟾苑桂飄香。雅稱姮娥珍惜。吹下一叢仙種。伴秋光岑寂。金風玉露嫩涼天。造化有消息。醉賞綠雲金粟。媚枝頭月色。

又 已丑重陽
遊雷峯

商素肅金飈。吹帽又逢佳節。乘興登臨舒嘯。翫雲林清絕。高歌橫

劍志平戎。酒量與天闊。更待醉歸開宴。賞東籬明月。

又燈花

良月戒微寒。清夜祥煙馥郁。來報天庭喜事。現燈花金粟。芝書奎
畫下層霄。宜召想來促。他日玉堂揮翰。賜金蓮花燭。

蘭陵王 涵碧

晚雲碧。松蠟飛泉翠滴。雙魚畔疑是永和。曲水流觴舊風物。波光映
山色。時見輕鷗出沒。壺天邃脩竹翠陰。虛籟吟風更幽寂。登臨興
何極。上煙際危亭。綵筆題石。山中猿鶴應相識。對遠景舒嘯。壯懷豪
逸。劉郎何在翫石刻。感往事陳迹。還憶少年日。帥旗鼓文場。軒冕
京國。如今老大機心息。有陶令秫酒。謝公山屐。閒來潭洞。醉皓月。弄
橫笛。

宴桃源 遊湖

西湖避暑棹扁舟。忘機狎白鷗。荷香十里供瀛洲。山光翠欲流。歌
浩浩。思悠悠。詩成興未休。清風明月解相留。琴聲萬籟幽。

又

廉纖小雨養花天。池光映遠山。蕙蘭風暖正暄妍。歸梁燕翼偏。芳
草碧。綠波漣。良辰近禁煙。酒酣午枕興怡然。鶯聲驚夢仙。

惜芳菲 述懷

寓意登臨詩與酒。豪氣直衝牛斗。揮翰風雷吼。我生嗟在東坡後。
流水高山琴靜奏。莫笑知音未偶。天意君知否。窮通在道吾何有。

江神子 南園

雨餘乾鵲報新晴。曉風清。聽鶯聲。飛蓋南園。遊賞賦閒情。麥隴黃雲
堆萬頃。收刈處。有人耕。淙琤漱玉澗泉鳴。翠峯橫。碧雲凝。罨畫園
林。縑素寫難成。盧橘楊梅時正熟。隨處賞。飲班荆。

驀山溪 九日

年年九日。黃菊登高宴。今歲旅新豐。聽征雁吟蛩幽怨。行行遊賞。邂逅得詩人。呼斗酒。發清吟。豪氣凌霄漢。窮通默定。志士那興歎。寓意醉鄉遊。且贏得開懷蕭散。功名外物。何必累沖襟。鍊丹井。叱羊山。尋箇修真伴。

又 鑑湖

鑑湖千頃。四序風光好。撥棹皺漣漪。極目處青山繚繞。微茫煙靄。鷗鷺點菰蒲。雲帆過。釣舟橫。俱被勞生擾。知章請賜。獨占心何小。風月本無私。同衆樂寧論多少。浮家泛宅。他日效陶朱。烹鱸鱖。酌松醪。吟筆千篇掃。

又 乾道戊子秋
日遊涵碧

深秋澄霽。煙淡霜天曉。翠峴峻摩穹。有碧澗清溪繚繞。鳴絃多暇。乘

興約同臨。聽水樂。翫豐碑。遐想東坡老。當年叔子。何事傷懷抱。名
與此山俱。歎無聞。眞成可笑。吾儕勲業。要使列雲臺。擒頡利。斬樓蘭。
混一車書道。

又

渡江
詠潮

潮生潮落。千古長如許。吳越舊爭衡。覽遺迹。英雄何處。胥神忠憤。賈
勇助鯨波。湍砥柱。駕鰲峯。萬騎轟鼉鼓。連天雪浪。直上銀河去。擊
楫誓中流。劍衝星。醉酣起舞。丈夫志業。當使列雲臺。擒頡利。斬樓蘭。
雪恥殲狂虜。

又九日

佳辰游九。吹帽霜風峭。畫閣勢崔嵬。遍危欄。翠峯繚繞。茂林修竹。別
是小壺天。煙靄淡。夕陽明。隱映溪光渺。匣琴流水。休恨知音少。長
嘯對西風。覺志氣。凌雲縹緲。傳杯興逸。高會繼龍山。簪嫩菊。插紅萸。

相對年年好。

東坡引 九日

涼飈生玉宇。黃花曉凝露。汀蘋岸蓼秋將暮。登高開宴俎。傳杯興逸。分詠得句。思戲馬長懷古。東籬候酒人何處。芳樽須送與。

水龍吟 梅

自來百卉千葩。算多有異芬清絕。天然標致。於中超越。月臉粧勻。碧瓊扶瘦。真仙風骨。向嚴寒雪裏。千林凍損。鍾和氣。先春發。信是芳姿高潔。肯趨陪遊峰戲蝶。玉堂靜處。竹梢斜亞。凝煙媚月。一任嚴城上。單于奏角聲淒切。待芳心結實。和羹鼎鼎。收功須別。

滿江紅

淳熙丁酉六月十三日。浙憲芮國瑞巡歷東陽。招飲涵碧。是日也。實予始生之日。國瑞用舊詞韻。作滿江

紅爲壽。因和述懷。

味道韜光。伴耕釣城南澗曲。吾不羨煉丹金井。訪仙王屋。清節無瑕

通隱顯。滿堂豈肯貪金玉。向北窗高臥。水風涼。槐陰綠。聞自賞。東籬菊。偏喜種。幽居竹。信巍然良貴。有榮無辱。外物隨緣姑泛應。無心仕止常知足。喜聖時協氣。屢豐年。西疇熟。

又

日暖煙輕。竹梢映花陰。凌亂。微風皺池光。弄碧。綠楊垂岸。艷杏牆頭。紅粉媚。幽蘭砌下。飄香暖。稱邀賓。排日去尋芳。頻歡宴。光景速。渾如箭。醉夢裏。春強半。且花前莫厭。玉杯頻勸。一枕遊仙方警悟。浮名自笑猶縈絆。醉揮毫付與雪兒歌。嬌鶯轉。古詩。麗詞。付與雪兒歌。

桂飄香元名花
心動

律應清商。嫩涼生金風。乍飄林葉。玉兔騰精。光浸樓臺。宛似廣寒宮闕。遠山橫翠。煙飛斂。鵲枝繞。蛩聲淒切。氣蕭爽。一年好處。桂花時節。香壓羣芳妙絕。記蟾窟高枝。兩曾攀折。思報君親。何事壯懷猶鬱。

傅巖莘野時方隱。心先定。經綸施設。賞花醉持杯。更邀皓月。

喜遷鶯

上巳。遊涵碧。

艷陽時序。向被袂芳辰。登臨仙府。碧水澄虛。脩篁聳翠。夾徑蕙蘭香。唾。春晚巧鶯聲碎。風捲飛紅無數。凝望處。見桑村麥隴。竹溪煙浦。歡聚。須信道。遊宦東西。易得成離阻。北海開樽。東山乘興。四樂偷閑。贏取。棋戰新來嘗勝。詩瘦只因吟苦。心湛靜。笑白雲多事。等閒爲雨。

八六子 九日

晚秋時。碧天澄爽。云何宋玉興悲。對美景良辰。樂事探萸簪菊。登臨共上翠微。堪嗟烏兔如飛。秉燭歡遊。須屢傳杯。到手休辭。念戲馬臺存。雋遊安在。且開懷抱。聽歌金縷。從教下客。疎狂落帽。也勝齷齪東籬。李太白詩。齷齪。東籬。下淵明不足羣。醉中歸。花陰月影正移。

木蘭花慢

和舊詞韻

念行藏。在道。仕宦豈爲謀身。自謗起營蠅。東山高臥。北海開樽。榮枯置之度外。得饒人處。謾也饒人。須信吾躬道義。巍然良貴中存。浮名。蝸角是非蚊。過耳總休論。且嘯傲幽居。清風皓月。光景常新。佩琴行吟勝景。訪林泉避暑。賞煙雲。誰識懷忠。賦畝。此心嘗不忘君。

柳梢青 遊湖

湖岸千峯。嵌巖隱映。綠竹青松。古寺東西。樓臺上下。煙霧溟濛。波
光萬頃溶溶。人面與荷花共紅。撥棹歸歟。一天明月。十里香風。

哨遍

東坡採歸去來詞。作哨遍。音調高古。雙溪居士驟括赤壁賦。被之聲歌。聊寫達觀之懷。寓超然之興云。

王戌孟秋。蘇子夜遊。赤壁舟輕漾。觀水光瀾灩。接遙天。月出於東山之上。與客同清歡。扣舷歌詠。開懷飲酒情酣暢。如羽化登仙。乘風獨立。飄然遺世高尙。客吹簫音韻。遠悠颺。怨慕舞潛蛟。動淒涼。自古英雄。孟德周郎。舊蹤可想。噫。水與月兮。逝者如斯。曷嘗往。變化如一。

瞬。盈虛兮莫消長。自不變而觀。物我無盡。何須感物興悲悵。夫天地之間。物各有主。惟同風月清賞。念江山美景豈可量。吾與子樂之興。襄羊。聽江渚樵歌漁唱。侶魚蝦友麋鹿。舉匏尊相勸。人生堪笑蟬。一夢。且縱扁舟放浪。戲將坡賦度新聲。寫高懷自娛閒曠。

小重山

風颭池荷雨蓋翻。明珠千萬顆。碎仍圓。龜魚浮戲。皺清漣。翠光映垂柳。冪瑤煙。幽興寓薰絃。俗塵飛不到小壺天。身閒無事自超然。拚醕酲一枕夢遊仙。

滿庭芳

榴艷噴紅。槐陰凝綠。薰風初扇微涼。新荷舒蓋。翠色映波光。時見金鱗戲躍。聽鶯聲巧轉垂楊。誰知我身間無累。對景自襄羊。南堂清晝永。瑤琴橫膝。芸帙披香。負氣衝牛斗。操凜冰霜。吟筆通神掣電。乘

高興鯨吸飛觴。情何感君親未報。功業志難忘。

卜算子 夢仙

午枕夢遊仙。身到蓬萊境。何事鸞聲轉綠楊。剛把人驚醒。乘興對
琴樽。寄傲吟光景。繞舍清陰映遠岑。香篆槐堂靜。

粉蝶兒

繞舍清陰。還是暮春天氣。徧蒼苔亂紅堆砌。問留春不住。春怎知人
意。最關情。雲杪杜鵑聲碎。休怨春歸。四時有花堪醉。漸紅蓮艷粧
依水次。芙蓉巖柱。與菊英梅蘂。稱開尊。日日殢香偎翠。

臨江仙

三洞煙霞多勝致。壺中別有登臨。白鷗飛處晚雲深。羣峯羅戶牖。空
翠入衣襟。分得雙溪樓上景。四時佳趣供吟。浩歌鯨飲酒頻斟。鶯
花休恨別。風月是知音。

浪淘沙 述懷

清介百無求。民瘼懷憂。席珍藏器效前修。自負平戎經國略。壯氣橫秋。二紀歎淹留。尋壑經邱。醉吟適意且遨遊。致主丹心猶未老。天意知不。

定風波

萬箇琅玕篩日影。兩堤楊柳蘸漣漪。啼鳥一聲林愈靜。吟興。未曾移步已成詩。旋汲清湘烹建茗。時尋野果勸金卮。况有良朋談妙理。適意。此歡莫遣俗人知。

青玉案

煙村茂樾灣溪畔。似遠景摹輕練。細草平沙騎款段。漁翁欵乃。卻驚鷗鷺。飛起澄波面。班荆對飲垂楊岸。枝上鶯歌如解勸。山映夕陽霞綺散。醉吟乘興。錦囊詩滿。愛月歸來晚。

使牛子

晚天雨霽橫雌電。簾捲一軒月色。紋簟坐苔茵。乘興高歌飲瓊液。
翠瓜冷浸冰壺碧。茶罷風生兩腋。四座沸歡聲。喜我投壺全中的。

望海潮

紹興府西園席上

會稽藩鎮。舟車都會。槐庭燕寢凝香。禹穴舊蹤。蘭亭勝致。千巖萬壑
生光。興頌美龔黃。慶慈闈戲綵。眉壽而康。寓興西園。月臺風榭賞
羣芳。

